

# तीतुस

**1** पौलुस की ओर ते जउन परमेसुर केर दास हई, अउर यीसु मसीह केर परेरित हई, परमेसुर के चुने भये लोगन क विसवासु अउर ऊ सांच के पहचान के मुताबिक जउन भगती केर हई। <sup>2</sup>ऊ अनन्त जीवन के आसा पय जे की परतिग्यां परमेसुर जउन झूठ नाई बोल सकत सनातन ते किहिस हई। <sup>3</sup>पर ठीक समय पे आपन बचन का परचार क दुआरा परगट किहिस जउन हमरे उद्धार करन वाले परमेसुर की आग्या केर मुताबिक मोंका सउँपा गवा। <sup>4</sup>तीतुस के नाम जउन विसवासु की साझेदारी कइ विचार ते हमार सच्चा पूत हई। परमेसुर अउर हमार उद्धार करन वाले बाप मसीह यीसु ते अनुग्रह अउर सान्ती होय रहै।

**क्रेते केर मंडली केर परबन्ध केर बारे मा चितौनी**

<sup>5</sup>हम ई तई, तुमका क्रेते मा छाँड़ि आयेन रहन कि तुइ बची भई बातन का सुधारउ। अउर हमरी आग्या केर माफिक नगर—नगर पुरखन का नियुक्त करउ। <sup>6</sup>जउन बेकसूर अउर एकइ मेहरारु के मनई होवै, जीकै लरिके वाले, विसुवासी होवै, अउर कुकरम, उदंडता का दोसु नाहीं होय। <sup>7</sup>काहे ते की, परधान का परमेसुर केर भंडारी होवे के कारन निरदोस होवे का चाही, ना हठी, विरोधी पियक्कड़ ना मारपीट करै वाला अउर न नीच कमाई केर लोभी होय के चाही। <sup>8</sup>पर पहुनाई करइ वाला भलाई का चाहै वाला, नियायी, पवितर अउर इन्द्रियन का जीतै वाला होय। <sup>9</sup>अउर विसवासु जोग बचन पर जउन धरम केर उपदेसु केर मुताबिक हई, अटल राहे की खरी सिच्छा ते उपदेसु दइ सकै अउर विवादियन केर मुंह बन्द कर सकइ।

<sup>10</sup>काहे ते की बहुतेन मनई निरंकुस बकवादी अउर धोखा दइ वाले आएँ, विसेस कर के खतना वालन मं से। <sup>11</sup>इनके मुंह बन्द कर देके चाही ई लोग अनुचित कमाई के लिए खराब बातें सिखाय कर कइ

घरन का बिगाड़ देत हई। <sup>12</sup>उही मा ते एक जन जउन उनहिन केर भविसवकता हई, कहिस की क्रेतेवासी हमेंसा झूठे, दुस्ट, पसु अउर आलसी पेटू होत हई। <sup>13</sup>यू गवाही सांच हई, ई लिए ऊका कड़ाई ते चितावा कर की उइ, विसुवासु मा पक्के हुइ जांय। <sup>14</sup>अउर उइ यहूदियन की कथा अउर कहानियन अउर मनई की आग्या प मन न लगावइ जउन सांचइ ते भटक जात हई। <sup>15</sup>नीक लोगन क लिये सब चीज नीक हई, पर खराब अउर अविसवासी केर लिये कुछउ नीक नाहीं, बरन ऊ की बुद्धि अउर विवेक दूनउ खराब हई। <sup>16</sup>उइ कहित हई कि हम परमेसुर का जानित हई, पर आपन कामन ते उनके इनकार करित हई। काहे ते की उइ घृणित अउर आग्या न मानइ वाले आयें, अउर कोई नीक काम केर जोग न आये।

**सबै जातिन केर लोगन मा परभु यीसु क्यार कउन संदेसु**

**2**पर तुम अइसी बातें कहा करउ जउन ठीक अउर उपदेसु जोग होयं। <sup>2</sup>अउर बूढ़ मनई होस मा, गंभीर अउर सबरदार होवे, अउर ऊका विसुवासु पिरेम अउर धीरज मा पक्का होय।

<sup>3</sup>यू ही परकार ते बूढ़ मेहरारु केर चालु—चलन पवितर लोगन सा होय दोसु लगावै वाली अउर पियेइ वाली ना होय। पर नीक बातन का सिखाये वालिन होयं। <sup>4</sup>ताकि उइ जवान मेहरारु का चितवत रहै कि आपन मनई अउर लरिकन ते पिरेम राखइ। <sup>5</sup>अउर सबुरी पतिबरता, घर का कामकाज संभालेइ वालेन नीक अउर अपने मनई केर नेरे रहै वाली होय। ताकि परमेसुर केर बचन की हंसाई ना होय पाये।

<sup>6</sup>अइसन जवान मनईन का समझावा करउ कि उइ सबरदार होयं। <sup>7</sup>सब बातन मा अपने आपका नीक कामन केर नमूना बना अउर तोहरे उपदेसु मा

सफाई गम्भीरता होय।<sup>8</sup>अउर अइसी खराई पाई जाये कि कोई ऊ का बुरा न कहि सकइ। जिहते विरोधी हम पे कउनउ दोसु लगावइ क पावें अउर न लज्जित होवें।

<sup>9</sup>दासन का समझाउ कि अपन—अपन मालिक केर मातहती मा रहैं अउर सब बातन ते उन का खुस राखें अउर उलटि कइ जवाबु न देयें।<sup>10</sup>चोरी चालांकी न करैं। सब परकार ते पूरे विसुवासी निकरैं कि उइ सब बातन मा हमरे उद्धारकरता परमेसुर की बचन की सोभा बढ़ावइ।

<sup>11</sup>काहे ते कि परमेसुर केर अनुग्रह परगट हय, जउन सब मनईन केर उद्धार करिन हइ।<sup>12</sup>अउर हमका चेतावत हइ कि हम अभगती अउर संसारिक बातन ते मन फेरि कै यू जुग मा सबुरी अउर धरम भगती ते जीवन बितावै।<sup>13</sup>अउर ऊ धन्य आसा की मुला आपन महान परमेसुर अउर उद्धारकरता यीसु केर महिमा परगट होय की जोहत रहैं।<sup>14</sup>जउन अपने आप का हमरे लिये दै दिहिस, ई हमका हर परकार केर अधरमन ते छुड़ाय लेय, अउर नीक करके अपन लिए एक अइसी जाति बनाइ लेइ जउन नीक कामन के खातिर सचेत होय।

<sup>15</sup>पूरे अधिकारु के साथे ई बातें कह समझाय अउर सिखावत रहैं कि कोई तोहका तुच्छ न जानइ पावइ।

### भला करौ

**3**लोगन का सुध दिलवाओ की हाकिमन, अधिकारियन के मातहती म रहैं, अउर ऊकी आग्या मानैं, अउर हर एक नीक काम के खातिर तइयार रहैं।<sup>2</sup>केहू का बदनामु न करै, झगड़ेलू न होय, नरम सुभाव केर होवे, अउर सब मनइन के साथ बड़ी नीकी तना रहैं।

<sup>3</sup>काहे ते की हम पहले बुद्धू अउर कहा न मानैं वालेन, अउर भ्रम पा पड़े रहन, अउर तमाम तरीके

केर रंग रलियों तथा भोग विलास के दास रहैं अउर बैर भाग जलन करकै जीवन काटित रहैं।<sup>4</sup>मुला जब हमरे उद्धारकरता परमेसुर की किरपा अउर मनई पर ऊ का पिरेम परगट हुआ।<sup>5</sup>तउ ऊ हमार उद्धार किहिस, अउर यू धरम के कामन कारन नाहीं, जउन हम अपन—आप कीहेन पर आपन दया क मुताबिक नवा जनम केर नहान अउर पवितर आतमा हमका नवा बनाइस।<sup>6</sup>जउन हमरे उद्धारकर्ता यीसु मसीह ते हम पर डारिस।<sup>7</sup>जीते हम ऊके अनुग्रह ते धरमी अउर जादा की आसा केर वारिस बनी।<sup>8</sup>यू बात सांच हइ, अउर हम चाहित हइ, कि तुम ई बातन के बारे मा हियाव, ते बोलेइ इ लिए का जउन परमेसुर केर विस्वास कीन्ह हौ ऊ नीक—नीक कामन मा धियान राखै, यू बातें नीक अउर मनइन केर लाभ की है।

<sup>9</sup>पर बेकार बातन बंस अउर बैर, विरोधु झगड़न ते जउन बेवस्था के बारे मा होय बचा रहैं। काहे ते की ऊ बेकार है।<sup>10</sup>कोही पाखंडियन का एक दुइ बार समझावइ—बुझावइ की उसे अलग रहो।<sup>11</sup>यू जान के की अइसन मनई भरमाये गवा है। अउर आपन का दोसी मान कै पाप करत रहत है।

### आखिरी वचन

<sup>12</sup>जब हम तोहरे पार 'अरतिमास' या तुखीकुस क्यार भेजी तो हमरे पास नीकुपुलिस आये का जतन किहेव काहे ते की हम उहाँ जाइ काटै की ठानै हन।<sup>13</sup>जेनास धर्मविद्वान अउर अपुल्लोस का जतन कर कै आगे पहुंचाय दिहो, अउर देख लिहो कि ऊ कौनो चीज केर घटी न होयक पावैं।<sup>14</sup>अउर हमरे लोग घटों को पूर करै के लिये नीकु कामन मा लगे रहैं। काहे ते कि सीखैं ताकी खाली न रहैं।

<sup>15</sup>हमरे सब साथिन का तुमका नमस्कार। अउर जउन विसवासु कै कारन हमते पिरेम राखत है ऊ का नमस्कार। तुम सबै पर अनुग्रह होत रहैं।